

# Kuns en vermaak

f Sluit aan by ons blad op Facebook. Die webadres is <http://companies.to/beeld-die>

kuns@beeld.com ☎ 011 713 9284

## Amerikaners kom sing in 'Carmen'

Thys Odendaal

**T**wee Amerikaanse sangers wat groot opgang maak in operahuise in die VSA en Europa – die sopraan Cristina Nassif en die tenoor Noah Stewart – is deur Opera Africa genooi om die hoofrolle te sing in sy voorstelling van Bizet se *Carmen* in Pretoria en Johannesburg volgende maand.

Die “tradisionele produksie”, wat deur nog ’n Amerikaner, Timothy Myers, gedirigeer word, is van 18 tot 26 Maart in die Opera van die Staats-teater op die planke en van 1 tot 10 April in The Mandela van die Joburg-teatersentrum in Braamfontein.

Dié gewildste Bizet-opera is al voorheen deur Opera Africa opgevoer, geplaas in ’n township met die mezzo-sopraan Sibongile Khumalo in die naamrol. Dit is in die Playhouse gebied toe Opera Africa in Durban gevestig was en ook in die Pro Musica-teater in Roodepoort.


### Bizet-opera eersdaags in Pretoria en Johannesburg



**Cristina Nassif: Carmen**

Suid-Afrikaanse sangers is opgeneem in die res van die rolbesetting.

Die ander twee hoofrolle word gesing deur die sopraan Kelebogile Boikanyo as Micaela en die bariton Ntsikeleko Mali as die stiervegter Es-



**Noah Stewart: Don José**

camillo. Die ander sang-soliste is Rouel Beukes (Zuniga), Aubrey Lode-wyk (Dancaïro), Teresa de Wit (Mer-cédés), Friedel Mitas (Frasquita), Pheny Modiane (Remendado) en Joey Masemola (Morales).



**Kelebogile Boikanyo: Micaela**

Die twee kore wat optree – die Opera Africa-operakoor en die Jakaranda-kinderkoor – word afgerig deur Hein de Villiers. Myers dirigeer die Johannesburg Philharmonic.

Die regisseur van die nuwe produk-

sie is James Marvel, die dekor- en kostuumontwerper is Steven Capone en die beligtingsontwerp is deur Simon King.

Nassif, het die *Washington Post* geskryf, is vinnig besig om haar te vestig as een van die voorste singende aktrises.

Benewens Carmen het sy reeds ’n indrukwekkende repertorium, waaronder Donna Elvira (*Giovanni*), Nedda (*Pagliacci*), Musetta (*Bohème*) en Rosina in *Il barbiere di Siviglia*.

Stewart sing van vroeë opera tot die eietydse. Hy is deur die befaamde sopraan Leontyne Price aangemoedig om sang aan die Juilliard-musiekskool in New York te studeer en hy het sedertdien reeds in talle Amerikaanse operahuise sy stempel afgedruk. Hy was voorheen Don José, maar in Peter Brook se verkorte *La tragédie de Carmen*.

Dié besprekings vir *Carmen* het reeds by Computicket geopen.

Navrae: ☎ 011 883 4189